

Inzko se sastao sa Davutoğluom: Izbori su prilika za novi početak



Građani BiH žele novi početak nakon nedavnih izbora, a to znači da ne treba gubiti vrijeme, već što prije uspostaviti vlast i rješavati hitne prioritete, izjavio je visoki predstavnik i specijalni predstavnik EU Valentin Inzko tokom sastanka sa turskim ministrom vanjskih poslova Ahmetom Davutoğluom, koji je održan danas u Sarajevu.

“Izbori pružaju političarima priliku za novi početak”, rekao je visoki predstavnik i specijalni predstavnik EU. “Birači su izašli na biračka mjesta kako bi izabrali lidere za sljedeće četiri godine i one stranke koje su dobile njihovu podršku imaju obavezu da hitno formiraju vlasti koje će riješiti izazove sa kojima se BiH suočava. BiH sebi ne može dozvoliti da izgubi još vremena.”

Visoki predstavnik i specijalni predstavnik EU je rekao da pored hitnih ekonomskih reformi koje će pomoći da se privuku investicije i smanji nezaposlenost, postoji neposredna potreba za rješavanjem neispunjenih uslova za tranziciju OHR-a, uključujući ispunjenje ciljeva u vezi sa državnom i vojnom imovinom. BiH će također morati hitno riješiti uslove koji se odnose na program u vezi sa EU, kao što je usvajanje zakonske regulative za popis stanovništva na cijeloj teritoriji BiH 2011. godine, te usklađivanje bosanskohercegovačkog ustava sa

Evropskom konvencijom za ljudska prava.

Visoki predstavnik i specijalni predstavnik EU pohvalio je Tursku zbog njenog konstruktivnog pristupa rješavanju dugo prisutnih pitanja u regionu i Bosni i Hercegovini. Inzko je dodao da se ozbiljni izazovi sa kojima se suočava Bosna i Hercegovina mogu uspješno riješiti ukoliko lideri budu spremni na postizanje kompromisnih rješenja.

Turski ministar vanjskih poslova Davutoğlu je čestitao građanima Bosne i Hercegovine na zrelosti pokazanoj tokom opštih izbora 3. oktobra. Ministar Davutoğlu je istakao važnost zaštite teritorijalnog integriteta i suvereniteta BiH i pozvao međunarodnu zajednicu da pomogne BiH da ispuni svoj krajnji cilj – integraciju u NATO i EU.

Davutoğlu je ponovo naveo opredjeljenje Turske za mirnu, stabilnu, prosperitetnu BiH i naglasio trajnu podršku Turske ulozi OHR-a u vezi sa tim.